

Tingkatkan Semangat Patriotisme Cintakan Negara - Timbalan Yang Di-Pertuan Agong Bernama 31 Julai, 2012

KUALA LUMPUR, 31 Julai (Bernama) -- Timbalan Yang di-Pertuan Agong Sultan Kelantan Sultan Muhammad V menyeru semua peringkat rakyat supaya meningkatkan semangat patriotisme yang cintakan negara.

Baginda bertitah semangat sedia berkorban demi negara perlu disemai dan disemarakkan sepanjang masa selain tidak melupakan jasa dan pengorbanan pahlawan negara.

"Sebagai rakyat Malaysia, kita hendaklah berusaha dan berazam untuk terus menyumbangkan sesuatu yang berguna sesuai dengan bidang masing-masing dalam mengekalkan keamanan dan kesejahteraan negara," titah baginda pada istiadat sambutan Hari Pahlawan 2012 di Dataran Merdeka di sini, Selasa.

Turut hadir Perdana Menteri Datuk Seri Najib Tun Razak dan isteri Datin Seri Rosmah Mansor, Menteri Pertahanan Datuk Seri Dr Ahmad Zahid Hamidi, Menteri Dalam Negeri Datuk Seri Hishammuddin Hussein, Ketua Polis Negara Tan Sri Ismail Omar dan Panglima Angkatan Tentera Jeneral Tan Sri Zulkifeli Mohd Zin.

Baginda bertitah rakyat Malaysia yang berbilang kaum juga harus memelihara hubungan baik dan bersikap toleransi antara kaum selain menjaga sensitiviti kaum.

"Beta berharap semua rakyat tanpa mengira keturunan, agama dan budaya bersatu padu dan hidup dalam rukun dan damai serta bersama membina negara.

"Sebagai rakyat Malaysia, kita hendaklah berusaha serta berazam untuk terus menyumbangkan sesuatu yang berguna sesuai dengan bidang masing-masing dalam mengekalkan keamanan dan kesejahteraan negara," titah baginda.

Sultan Muhammad V bertitah sejarah pembinaan dan kewujudan Malaysia amat berkait rapat serta seiring dengan sejarah kepahlawanan pejuang negara bermula dengan perjuangan penuh getir menentang tentera Jepun dalam era perang dunia kedua.

"Mengharungi perjuangan menentang pemberontakan komunis pada era darurat, menempuh cabaran pada era konfrontasi dan membanteras serta membersihkan

perbatasan negara dari saki baki komunis adalah antara detik-detik penting dalam catatan negara," titah baginda.

Baginda turut melahirkan rasa bangga dengan sumbangan bakti pasukan keselamatan di peringkat antarabangsa khususnya dalam melaksanakan tugas di bawah panji-panji Pertubuhan Bangsa-bangsa Bersatu (PBB).

"Setakat ini seramai 21,443 pegawai dan anggota Angkatan Tentera Malaysia (ATM) dan Polis Diraja Malaysia (PDRM) telah terlibat secara langsung dalam mencurahkan bakti untuk tugas-tugas bersama PBB.

"Semangat kental, berani serta gagah telah ditonjolkan oleh kontijen pasukan keselamatan kita yang berjuang walaupun bukan di bumi sendiri, selayaknya mereka juga turut dihargai sama seperti rakan-rakan seperjuangan di tanah air," titah baginda.

Baginda bertitah pembentukan negara dan pembangunan ekonomi banyak bergantung kepada keamanan dan ketenteraman dalam negara.

"Pasukan keselamatan telah memainkan peranan penting dalam menangkis anasir subversif yang cuba memporak-perandakan negara serta membantu negara mencapai kemajuan dan kemakmuran," titah baginda.

Bagi mengenang kembali jasa-jasa pahlawan negara, baginda bertitah rakyat perlu prihatin dengan memberikan bantuan serta pertolongan yang dapat meringankan beban hidup mereka.

"Waris dan balu pahlawan yang gugur amat memerlukan bantuan serta sokongan padu kerajaan dan rakyat dalam menguruskan kelangsungan hidup, ingatan dan bantuan yang kita hulurkan akan menjadi sumber inspirasi dan dorongan kepada mereka," titah baginda.

Baginda turut mengingatkan kepada para pahlawan yang masih berkhidmat agar meneruskan curahan bakti demi keamanan, ketenteraman dan kesejahteraan negara serta melaksanakan amanah dan tanggungjawab dengan penuh komitmen dan bersungguh-sungguh.

"Tingkatkanlah lagi semangat kepahlawanan patriotisme, kesetiaan demi agama, bangsa dan negara, marilah kita sama-sama mempertingkatkan usaha untuk mengekalkan keamanan dan keharmonian negara yang kita cintai ini," titah baginda.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=684400>

